



Grundarfjarðarbær

Erindisbréf fyrir skólanefnd

1. gr.

Stjórnskipuleg staða.

Skólanefnd heyrir undir bæjarstjórn. Bæjarstjóri starfar með nefndinni. Hann undirbýr og situr fundi nefndarinnar og hefur þar málfrelsi og tillögurétt.

2. gr.

Skipan nefndarinnar.

Í skólanefnd eiga sæti fimm fulltrúar sem bæjarstjórn kýs til fjögurra ára að afloknum sveitarstjórnarkosningum samkvæmt ákvæðum sveitarstjórnarlaga og samþykktar um stjórn Grundarfjarðarbæjar. Á sama hátt eru kjörnir fimm fulltrúar til vara.

Eftirtaldir hafa rétt til setu á fundum skólanefndar, með málfrelsi og tillögurétt, á meðan fjallað er um málefni sem varða þeirra stofnanir sérstaklega, ef ekki er verið að fjalla um mál sem snerta þá persónulega:

- a. Skólastjóri Grunnskóla Grundarfjarðar ásamt fulltrúum grunnskólakennara og foreldra barna í grunnskólanum sem kjósa hvor úr sínum hópi aðal- og varamann.
- b. Leikskólastjóri Leikskólans Sólvalla ásamt fulltrúum starfsfólks leikskólans og foreldra barna í leikskólanum sem kjósa hvor úr sínum hópi aðal- og varamann.
- c. Skólastjóri Tónlistarskóla Grundarfjarðar.

Á fyrsta fundi nefndarinnar skal kjósa formann, varaformann og ritara. Nefndin getur ráðið sér sérstakan fundarritara utan nefndarinnar.

3. gr.

Hlutverk nefndarinnar.

Nefndin fer með eftirfarandi málefni:

- Málefni grunnskóla skv. 6. gr. grunnskólalaga nr. 91/2008,
- Málefni leikskóla skv. 4. gr. laga um leikskóla nr. 90/2008,
- Málefni tónlistarskóla skv. 2. gr. laga um fjárhagslegan stuðning við tónlistarskóla nr. 75/1985,

Helstu verkefni nefndarinnar skv. 6. gr. laga nr. 91/2008 um grunnskóla eru:

- að sjá til þess að öll skólaskyld börn sem rétt eiga á skólavist í sveitarfélaginu njóti lögboðinnar fræðslu,
- að staðfesta starfsáætlun skóla ár hvert og skólanámskrá einstakra skóla,
- að fylgjast með framkvæmd náms og kennslu í sveitarfélaginu og gerð skólanámskrár og gera tillögur til skólastjóra og/eða sveitarstjórnar um umbætur í skólastarfi,
- að fylgjast með og stuðla að því að nemendum og skólum sé tryggður aðgangur að sérfræðipjónustu,
- að sjá til þess að jafnan sé fyrir hendi viðeigandi húsnæði fyrir kennslu og annar aðbúnaður, þ.m.t. útivistar- og leiksvæði nemenda,
- að hafa eftirlit með að ákvæði laga og reglugerða séu uppfyllt og gera tillögur til sveitarstjórnar um úrbætur,
- að stuðla að tengslum og samstarfi leikskóla og grunnskóla annars vegar og grunnskóla og framhaldsskóla hins vegar.

Önnur verkefni nefndarinnar eru:

- að vera bæjarstjórn til ráðgjafar í skólamállum;
- að staðfesta starfsáætlun leikskóla og tónlistarskóla og skólanámskrár þeirra
- að gera tillögur til bæjarstjórnar um markmið í málaflokkum sem undir nefndina heyra;
- að hafa eftirlit með því að samþykkt markmið bæjarstjórnar í þessum málaflokkum nái fram að ganga;
- að vera umsagnaraðili til bæjarstjórnar um ráðningar skólastjóra grunnskóla, leikskóla og tónlistarskóla;
- að hafa eftirlit með því að ákvæði laga á verksviði nefndarinnar séu haldin,
- að starfa með bæjarstjóra að málum er undir hann og nefndina heyra;
- að hafa eftirlit með skólatengdu starfi sem veitt er í skólanum utan skólatíma, svo sem heilsdagsskóla;
- að hafa eftirlit með skólaakstri nemenda.
- að sinna öðrum málefnum sem undir nefndina heyra eftir því sem lög og reglugerðir ákveða og bæjarstjórn felur henni;

Skólanefnd hefur umsagnarrétt um tillögur forstöðumanna við fjárhagsáætlunargerð og getur gert sínar tillögur til bæjarráðs.

Sé nefndinni ekki falið að taka fullnaðarákvörðun um mál, skv. lögum eða erindisbréfi þessu, teljast ályktanir hennar tillögur til bæjarstjórnar, enda þótt þær séu orðaðar sem ákvarðanir eða samþykktir nefndar. Slíkar ákvarðanir þurfa staðfestingu bæjarstjórnar.

4. gr.

Starfshættir.

Um starfshætti nefnda er sérstaklega fjallað í VI. kafla samþykktar um stjórn Grundarfjarðarbæjar og skal þeim fylgt eftir því sem við á.

Skólanefnd kemur saman fyrir luktum dyrum á fastákveðnum fundartíma að jafnaði einu sinni í mánuði. Nefndinni er heimilt að opna fundi sína komi fram ósk um slíkt svo fremi sem lög eða eðli máls hamli því ekki.

Um fundi nefndarinnar, ályktunarhæfi og atkvæðagreiðslur gilda ákvæði III. kafla samþykktar um stjórn Grundarfjarðarbæjar og sveitarstjórnarlaga eftir því sem við getur átt.

Nefndin skal halda gerðabók. Um ritun fundargerða gilda sömu reglur og um ritun fundargerða bæjarstjórnar, sbr. ákvæði í III. kafla samþykktar um stjórn Grundarfjarðarbæjar.

Formaður sér um boðun funda í samráði við bæjarstjóra. Fundarboðun skal vera með tölvupósti og tilgreina fundarstað, tíma og dagskrá. Fundarboð ásamt gögnum sem fyrir liggja um þau mál sem taka á fyrir skal sent fulltrúum og öðrum sem seturétt hafa á fundum eigi síðar en einum sólarhring fyrir fund.

Formaður stýrir fundum nefndarinnar skv. ákvæðum VI. kafla samþykktar um stjórn Grundarfjarðarbæjar.

Fundur telst ályktunarhæfur ef meirihluti nefndarinnar er mættur á fundi. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

5. gr.

Réttindi og skyldur.

Um réttindi og skyldur fulltrúa í skólanefnd gilda ákvæði sveitarstjórnarlaga og samþykktar um stjórn Grundarfjarðarbæjar eftir atvikum.

Fulltrúa er skylt að sækja fundi nema lögmæt forföll hamli.

Hver fulltrúi á rétt á að koma máli á dagskrá fundar, enda skilar hann efni þess til bæjarstjóra a.m.k. tveimur sólarhringum fyrir fund.

Fulltrúar í skólanefnd skulu hafa hag bæjarfélagsins að leiðarljósi við störf sín í nefndinni, en eru ekki bundnir af öðru en sannfæringu sinni, lögum og samþykkt um stjórn Grundarfjarðarbæjar í atkvæðagreiðslu um málefni á vegum nefndarinnar.

Fulltrúar eru bundnir þagnarskyldu vegna mála, sem þeir fá vitneskju um í starfi sínu fyrir nefndina og ætla má að leynt eigi að fara skv. eðli máls eða lögum, hvort sem þau varða einka- eða almannahagsmuni. Þagnarskylda helst óbreytt þótt menn hætti setu í nefndinni eða láti af störfum á hennar vegum.

Fulltrúi skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo sérstaklega að almennt má ætla að viljaafstaða hans mótist að einhverju leyti þar af. Honum er þó heimilt að gera stuttlega grein fyrir afstöðu sinni áður en hann víkur af fundi.

6. gr.

Skólanefnd skal taka til meðferðar öll kærumál sem upp kunna að koma og varða ákvæði laga nr. 91/2008 um grunnskóla. Um meðferð slíkra kærumála gilda ákvæði stjórnarsýslulaga nr. 37/1993.

7. gr.

Lög og reglugerðir.

Í störfum sínum skal nefndin taka mið af þeim lögum og reglugerðum, sem um starfssvið hennar gilda hverju sinni.

Þá skal nefndin fylgja samþykkt um stjórn Grundarfjarðarbæjar eins og hún er hverju sinni og kynna sér ákvæði sveitarstjórnarlaga.

8. gr.

Gildistaka.

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum og samþykkt um stjórn Grundarfjarðarbæjar.

Erindisbréf þetta var samþykkt í bæjarstjórn Grundarfjarðar þann 29. apríl 2014 með vísan til 47. gr. B 3. samþykktar um stjórn Grundarfjarðarbæjar nr. 780/2013 og tekur þegar gildi.

Grundarfirði, 30.apríl 2014.

Björn Steinar Pálmason, bæjarstjóri